

DOMENIE XII «VIE PAL AN»

Antifone di jentrade cf. Sal 27,8-9

Il Signôr al è une fuarce pal so popul,
pal so consacrât une crete di salvece.
Salve il to popul, Signôr,
benedìs la tô ereditât e indrecile par simpri.

Colete

Danus la gracie, Signôr,
di vê pal to non sant un timôr simpri compagnât dal amôr,
parcè che no tu lassis mai cence la tô guide
chei che tu ju âs inlidrisâts su la fonde dal to amôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Za 12,10-11; 13,1

Si voltaran de bande di chel che a àn passât fûr par fûr.

Dal libri dal profete Zacarie

Cussì al dîs il Signôr: «O sborfarai su la cjase di David e su la int di Jerusalem un spirt di gracie e di confuart; si voltaran de bande di chel che a àn passât fûr par fûr e a vaiaran sore di lui come che si vai sore di un fi unic; a fasaran par lui un corot plen di marum, come che si fâs par un primarûl. In chê dì si sintarà in Jerusalem une grande vaiude, come chê di Adad-Rimon te planure di Meghido». In chê dì e spissularà une risulative pe cjase di David e pe int di Jerusalem, par lavâju dal pecjât e de sporcjetât.

Peraule di Diu.

SALM RESPONSORIÂL dal Salm 62

R. E à sêt di te, Signôr, la mê anime.

Diu, Diu gno, sul crichedî o soi pront a cirîti;
e à arsetât di te la mê anime;
viers di te la mê cjar e brame
come une tiere sute, arsinide, cence aghe. **R.**

Cussì mi soi metût a cjalâti tal to santuari
par viodi la tô potence e la tô glorie.
Parcè che la tô gracie e vâl plui che no la vite,
a cjantaran i miei lavris lis tôs laudis. **R.**

Cussì ti benedissarai par dute la vite,
lis mans viers dal to non o slungjarai.
La mê vite si passarà come te miôr taulade,
biel che la mê bocje ti laudarà cjantant di ligrie. **R.**

Tu sês stât tu il gno jutori,
jo mi jempli di gjonde sot des tôs alis.
Tor di te si strenç la mê anime,
la fuarce de tô diestre mi sostente. **R.**

SECONDE LETURE Ga 3,26-29

Ducj vualtris che o sês stâts batiâts, si sês rivistûts di Crist.

De letare di san Pauli apuestul ai Galazians

Fradis, o sês ducj fîs di Diu in Crist Jesù midiant de fede; parcè che ducj vualtris che o sês stâts batiâts in Crist, si sês rivistûts di Crist. Nol esist plui ni Judeu ni Grêc, nol esist plui ni sotan ni libar, nol esist plui ni om ni femine: ducj vualtris o sês une persone sole in Crist Jesù. Se duncje o sês di Crist, alore o sês dissendence di Abram, erêts seont la promesse.
Peraule di Diu.

CJANT AL VANZELI cf. Zn 15,15

R. Aleluia, aleluia.

Us ài clamâts amîs, al dîs il Signôr,
parcè che dut ce che o ài sintût di gno Pari
us al ài fat cognossi.

R. Aleluia.

VANZELI Lc 9,18-24

Tu sês il Crist di Diu. Il Fi dal om al scuen patî un grum.

Dal vanzeli seont Luche

Une dì Jesù al jere tun lûc fûr di man, a preâ. I dissepui a jerin cun lui e lui ur fasè cheste domande: «Cui soio jo, seont la int?». I rispuinderin: «Par cualchidun Zuan il Batiste, par altris Elie, par altris ancjemò un dai profetis di une volte che al è resurît». Alore ur domandà: «Ma vualtris, cui disêso che jo o sedi?». Pieri, cjapade la perauale, i rispuindè: «Il Crist di Diu». Alore ur ordenà di no dî nuie a dinissun, e al zontà: «Bisugne che il Fi dal om al patissi un grum, al sedi condanât dai anzians, dai sorestants dai predis e dai scrituriscj, al sedi fat murî e al resurissi la tierce dì». Po ur disè a ducj: «Se cualchidun al vûl vignî daûr di me, al à di dineâ se stes, cjapâ sù la sô crôs ogni dì e vignî daûrmi. Parcè che chel che al volarà salvâ la sô vite le pierdarà, ma chel che al pierdarà la sô vite par colpe mê le salvarà».

Peraule dal Signôr.

Su lis ufiertis

Acete, Signôr, il sacrifici di pacificazion e di laude
e fâs che, purificâts di cheste nestre azion,
o podìn ufrîti un cûr ben disponût e che ti plasi.
Par Crist nestri Signôr.

Antifone a la comunion Sal 144,15

I vôi di ducj viers di te si voltin e a spietin,
e tu tu ur dâs di mangjâ su l'ore juste.

Daspò de comunion

Diu, che tu nus âs fats tornâ gnûfs
cul Cuarp sant e cul Sanc prezios di to Fi,
danus pal to boncûr di cjatâ une redenzie sigure
in ce che o fasìn dispès e cun devozion.
Par Crist nestri Signôr.